

竹書紀年集證

竹書紀年集證卷一

江都陳逢衡學

黃帝 帝摯

黃帝軒轅氏

原註母曰附寶

衡案拾遺記作吳樞宋志作符寶路史作符葆孝經鉤命訣云附寶出降

大靈生 見大電繞北斗樞星光照郊野感而孕

河圖握矩

黃帝名軒北斗黃神之精母地祇之女附寶之郊野大電繞樞斗星耀威附寶生軒轅胸文曰黃帝子○

星傳北斗七星在紫微 二十五月而生帝於壽邱

水經

渭水注又西北軒轅谷水注之水出南山軒轅溪南姚瞻以爲黃帝生於天水在上邽城東七十里軒轅

谷皇甫謐云生壽邱在魯東門北未知孰是也○路史國名紀壽邱在兗之曲阜東北六里○衡案論衡吉驗篇黃帝妊二十月生而能言抱朴子黃帝生而

龍顏

春秋元命包黃帝龍顏得天匡陽上法中宿取象文昌

有聖德効百神朝

而使之應龍攻蚩尤

逸周書黃帝執蚩尤殺之於中冀用名之曰絕轡之野○歸藏

蚩尤出自羊水登九淖以伐空桑黃帝殺之於青邱作桐鼓之曲十章○龍魚河圖黃帝時有蚩尤兄弟八十一人威振天下誅殺無道不仁慈萬民天遣元女下授黃帝兵信神符制伏蚩尤帝因使之主兵以制八方○黃帝內傳黃帝伐蚩尤元女爲帝製夔牛鼓八十面一震五百里連震三千八百里元女爲帝制司南車當其前記里鼓車居其右○古今註黃帝與蚩尤戰於涿鹿之野常有五色雲氣金枝玉葉止於帝上有花葩之象故因而作華蓋也○世紀黃帝使力牧神皇討蚩尤氏擒於涿鹿之野使應龍殺之

於鹵黎戰虎豹熊羆四獸之力馬驕曰世之言黃帝多怪誕不經謂馴擾

猛獸以戰炎帝夫猛獸惡可馴邪書曰如虎如豹如

熊如羆意或軍帥武勇之號如後世之虎牙驍騎者

而列子以為猛獸以女魃止淫雨山海經蚩尤作兵

有人心是妄也應龍攻之冀州之野應龍畜水蚩尤請風伯雨師

縱大風雨黃帝乃下天女曰魃雨止遂殺蚩尤天

下既定聖德光被羣瑞畢臻有屈軼之草田俅子黃帝時有草

生於庭階若佞臣入朝則草指之名曰屈軼生於庭佞人入朝則草指之

是以佞人不敢進統箋案已上皆休文附註並見宋志或以為紀年本文大謬○衡案

原註人皆謂宋書符瑞志之文然原註不可考

焉知非輯宋書者竊取竹書之註而為之耶

史記五帝紀黃帝者少典之子姓公孫名曰軒轅生

而神靈弱而能言幼而徇齊長而敦敏成而聰明軒

轅之時神農

氏世

衰諸侯相侵伐暴虐百姓而神農氏

弗能征於是軒轅乃習用干戈以征不享諸侯咸來

賓從而蚩尤最爲暴莫能伐炎帝欲侵陵諸侯諸侯

咸歸軒轅軒轅乃修德振兵教熊羆貔貅貙虎以與

炎帝戰於阪泉之野三戰然後得其志蚩尤作亂不

用帝命於是黃帝乃徵師諸侯與蚩尤戰於涿鹿之

野遂禽殺蚩尤而諸侯咸尊軒轅爲天子代神農氏

是爲黃帝。志疑案公孫非姓也黃帝乃少典國君

之後故稱公孫軒轅是其號漢律歷志黃帝始垂衣

裳有軒冕之服故天下號軒轅氏

索隱引世紀言黃帝居軒轅之邱因

以爲名殊妄蓋茲邱緣黃帝得名耳

然則黃帝何姓曰姓姬國語晉胥

臣云黃帝以姬水成蓋炎帝之所賜也唐劉知幾史

通序事篇謂五帝本紀無所取非妄詆也卽如此段

由前言之帝室衰而藩國暴由後言之其主虐而列

辟離半幅之內遽相牴牾同茲炎帝而或僅守府或

輒耀兵同茲黃帝而忽則翼君忽又犯上頓成矛盾

莫識所從炎帝其榆罔乎雖典籍無徵未必若桀紂

安得侵陵羣后而制之軒轅固聖帝何至日尊干戈  
習用軍旅孔子繫易稱黃帝堯舜垂衣裳而天下治  
倘依史所載則征伐而得天下當自黃帝始矣考逸  
周書嘗麥解赤帝命蚩尤字少昊以臨四方蚩尤攻  
逐帝於涿鹿黃帝乃執蚩尤殺之左傳僖廿五年黃  
帝戰阪泉之兆亦指蚩尤然則阪泉之戰卽涿鹿之  
戰是軒轅勤王之師而非有兩事故逸周書史記解  
稱蚩尤曰阪泉氏斯爲確證始緣炎帝世衰諸侯不  
享軒轅征之而來賓爲炎帝征也旣因蚩尤謀逆炎

帝蒙塵軒轅徵師以誅之爲炎帝誅也而天與人歸  
尊爲天子烏知非炎帝讓德遜位哉蓋紀中兩炎帝  
字俱蚩尤之誤其初三戰於阪泉而後勝之猶作亂  
不用命繼戰於涿鹿而乃殺之耳

路史黃帝紀黃帝有熊氏

或作雄

姓公孫

初姓後改姬

名茶

茶古舒字或作余王冰黃帝經號及難經疏乃云黃帝名全字轉訛

一曰軒軒之字曰

元律小典氏之子黃精之君也母吳樞曰符葆秘電  
繞斗軒而震二十有四月而生帝於壽邱故名曰軒  
生而紫氣充房身逾九尺附函挺朶修髯花瘤河目



隆顙曰角龍顏小典氏沒後軒嗣立成爲姬姓年三十七戮蚩尤於中冀於是炎帝諸侯咸進委命乃卽帝位都彭城

衡案路史少典取於有僑氏是曰女登生子二人一爲黃帝之先襲少典氏一爲神農是爲炎帝蓋少典始則其名繼乃因以爲氏非生黃帝者卽此取有僑之少典也外紀云初神農氏母弟世嗣少典氏爲諸侯帝榆罔之代少典國君之妃曰附寶者感電光繞斗而有身生帝於軒轅之邱因名軒轅語最明晰晉

語直云少典取有蟻氏生黃帝誤矣又案路史禪通紀云軒轅氏作於空桑之北紹物開智見轉風之逢不已者於是作制乘車橫木爲軒直木爲轅以尊太上故號曰軒轅氏蓋古封禪之帝也在黃帝氏之前昔蒙莊論至德之世軒轅世後乃有赫胥而尊盧祝融次之又後乃有伏羲神農黃帝其明著若是訊諸幣欸有黃帝金而又有軒轅金封禪文識有軒轅氏而又有黃帝氏則軒轅自爲古帝信矣後世惟見史遷紀黃帝名軒轅更復弗攷於古失之羅氏之說如

此故直以黃帝之名爲軒也夫蒙莊之言語多幻惑  
寧足取信若以幣款封禪爲憑又安知軒轅金之非  
卽黃帝金軒轅氏之非卽黃帝氏乎且諸書所載又  
有謂黃帝號有熊氏及老孫氏者豈又各爲一人乎  
今據竹書曰黃帝軒轅氏則軒轅卽黃帝非二人也  
故春秋命厯序云黃帝一曰帝軒轅可爲確證又案  
白虎通云黃帝始作制度得其中和萬世常存故稱  
黃帝後世德與天同亦得稱帝不能制作故不得復  
稱黃也此論與風俗通所云黃者光也厚也之說俱

屬附會蓋黃帝以土德王土色黃故稱黃帝亦猶神農氏以火德王而稱炎帝也

元年

統箋按春秋元命包曰元年者何元宜爲一謂之元何曰君之始年也後漢書律厯志曰黃帝造厯元起辛卯宋書禮志曰軒轅高辛夏后氏皆以十三月爲正前史疑問曰史稱黃帝始造甲子則今之甲子是也世史以癸亥紀元則甲子者黃帝之二年也而甲子會紀一書又從黃帝八年始何也今按竹書紀元

年不言歲星所在者所以闕疑而示信也

衡案甲子定於軒轅故紀年從黃帝始杜預謂起自夏殷周東晉傳謂紀年十三篇記夏以來皆統論之辭不足爲據惟和嶠云紀年起自黃帝與今本合

帝卽位居有熊

統箋按譙周曰黃帝有熊國君少典之子也皇甫謐曰有熊今河南新鄭是也古有鄭國黃帝之所都水經注曰姚瞻以爲黃帝都陳在陳倉輿地志云涿鹿本名彭城黃帝初都遷有熊也括地志曰涿鹿城在

媯州東南五十里本黃帝所都也大抵征戰所至都  
涿鹿卽位乃都有熊

鄭環曰黃帝少典之子生於新鄭之軒轅邱非生於  
兗州之壽邱也嗣爲諸侯當居有熊滅蚩尤討榆罔  
當居涿鹿諸侯尊爲天子當居榆罔之故都陳倉而  
後遷於壽邱陟於上郡葬於橋山蓋黃帝以兵衛傍  
行天下未嘗寧居亦安有一定之地耶

衡案白虎通黃帝有天下號曰有熊有熊者獨宏大  
道德也路史黃帝自有熊啟胙故又曰有熊氏國名

紀有熊帝之開國今鄭之新鄭今據紀年帝卽位居  
有熊則有熊是地名與羅氏合不得如白虎通所云  
初制冕服

衡案家語黃帝與炎帝戰克之始垂衣裳作黼黻拾  
遺記軒轅始造書契服冕垂衣故有袞龍之頌黃帝  
內傳帝伐蚩尤乃服袞冕世紀黃帝始去皮服爲上  
衣以象天爲下裳以象地通典黃帝作冕垂旒目不  
邪視黻纁示不聽讒言也路史法乾坤以正衣裳制  
袞冕設斧黻深衣大帶扉屨赤舄元衣纁裳絳纁黻

旂以規眎聽之逸房觀翬翟草木之花染爲文章以爲內服故於是有袞龍之頌以上數條俱黃帝初制冕服之證統箋引據周禮司服大行人諸制殊贅又按呂氏春秋胡曹作衣淮南子伯余作衣說文黃帝初作冕世本黃帝作旃冕伯余作衣裳於則作扉履胡曹伯余於則俱黃帝臣

二十年景雲見

原註有景雲之瑞赤方氣與青方氣相連赤方中有兩星青方中有一星凡三星皆黃色以天清明時見



於攝提名曰景星

統箋按石氏星經曰攝提六星夾大角星東向三三而居形似鼎足

附註有景雲之瑞下乃以景星釋之當由讀史記天官誤也天官書曰天精而景星見景星者德星也其狀無常出於有道之國若煙非煙若雲非雲郁郁紛紛蕭索輪囷是為卿雲蓋出於有道之國殊不審若烟以上謂景星也若烟以下謂景雲也史公連書之休文誤以為一而讀之殊鹵莽矣拾遺記曰軒轅有黃星之瑞考定曆紀景星蓋黃星也帝黃服齋於中宮坐於元扈洛水之上

春秋合誠圖黃帝遊元扈洛上與大司馬容光左右輔周昌等百二十人臨觀有鳳銜圖置帝前以黃玉為柙

○一統志元扈水在河南府永寧縣西五十里

有鳳凰集不食生蟲

不履生草或止帝之東園或巢於阿閣

尙書中候黃帝時天氣休

通五德期化鳳凰巢阿閣○路史註握河紀云堯卽政七十年鳳凰止庭伯禹拜曰昔帝軒題象鳳巢阿

閭白虎通云黃帝時鳳凰蔽日而至止於東園終身  
不去禮瑞命記云黃帝服黃服戴黃冕齋於宮鳳蔽  
日而來止帝園食竹實棲梧桐終不去○統箋  
按周書咸有四阿是則閭有四阿謂之阿閭或鳴

於庭其雄自歌其雌自舞山海經丹穴之山有鳥曰鳳凰自歌自舞麒麟

在園神鳥來儀尚書中候帝軒提象配永循機麒麟在園鸞鳳來儀○統箋按說文五方

神鳥中央曰鳳凰是神鳥來儀不專指鳳凰故又重言之有大螭如羊大螭如虹

帝以土氣勝遂以土德王呂氏春秋黃帝之時天先見大螭大螭黃帝曰土氣

勝土氣勝故其色尚黃其事則土○劉向別錄鄒衍言黃帝土德有螭如牛大螭如虹○拾遺記軒轅

出自有熊之國母曰吳樞以戊巳之日生故以土德王時有黃星之祥

統箋按春秋演孔圖曰黃帝將興黃雲升於堂孝經

援神契曰王者德至山陵則景雲出春秋運斗樞曰天子孝則景雲出遊淮南子天文訓曰龍舉而景雲屬後漢郎顗傳景雲降集註曰景雲五色雲也晉天文志曰慶雲亦曰景雲此喜氣也太平之應

衡案禮斗威儀云人君乘水而王其政和平則景雲見也景雲景明也言雲氣光明也詩推度災云外規有雲內有如羊而黃者景雲也

### 以雲紀官

統箋按昭公十七年左傳鄭子曰昔黃帝氏以雲紀

故爲雲師而雲名杜氏曰黃帝受命有雲瑞故以雲紀事百官師長皆以雲爲名號縉雲氏蓋其一官也應劭曰春官爲青雲夏官爲縉雲秋官爲白雲冬官爲黑雲中官爲黃雲

衡案史記五帝紀官名皆以雲命爲雲師置左右大監監於萬國路史其卽位也適有雲瑞因以雲紀百官師長俱以雲名乃立四輔三公六卿三少二十有四官凡百二十官有秩萃註云雲爲官名無所出惟內傳有縉雲氏虔佑等遂有青縉白黑黃五名之列

與五火五木五龍並不足信今案紀年以雲紀官與左傳合是虔佑等所論非無據也

五十年

統箋作五十七年

秋七月庚申鳳鳥至帝祭於洛水

原註庚申天霧三日三夜晝昏帝問天老力牧容成

曰於公何如

衡案於公何如言在公之意以爲休咎何若也宋志作於分誤天老力牧容成

俱黃帝臣

天老曰臣聞之國安其主好文則鳳凰居之國

亂其主好武則鳳凰去之今鳳凰翔於東郊而樂之

其鳴音中夷則

統箋按月令孟秋之月律中夷則則國語周景王問律於伶州鳩對曰夷則

所以歌詠九則平明無貳也韋昭注七月日夷則夷平也則法也言萬物既成可法則也庾信宮調曲鳳

響中夷則本此

與天相副以是觀之天有嚴教以賜帝帝勿

犯也召史卜之龜焦

統箋按定九年左傳注曰龜焦兆不成

史曰臣不

能占也其問之聖人帝曰已問天老力牧容成矣史

北面再拜曰龜不違聖智故焦霧既除游於洛水之

上見大魚殺五牲以醺之天乃甚雨七日七夜魚流

於海得圖書焉

河圖挺輔佐黃帝修德立義天下大治乃召天老而問焉余夢見兩龍挺

白圖以授余於河之都天老曰河出龍圖洛出龜書紀帝錄列聖人之姓號興謀治天下然後鳳凰處之今鳳凰已下三百六十日矣天其授帝圖乎黃帝乃祓齋七日至於翠鳩之川大鱸折溜而至乃與天老迎之五色畢具魚汎白圖蘭葉朱文以授黃帝名曰綠圖○水經洛水注昔黃帝之時天大霧三日帝遊

洛水之上見大魚殺五牲以醮之天乃甚雨七  
龍圖

日七夜魚流始得圖書今河圖視萌篇是也  
出河春秋運斗樞黃帝得龍圖龜書出洛尚書中候

龜書赤文統箋按篆字當作綠庚信樂府  
成字象軒赤文篆字龍圖基代德倪魯玉註竹書紀

年曰黃帝五十年龍圖出河龜書出洛  
蓋誤以沈約附註為紀年之本文也  
以授軒轅尚書

中候河出龍圖洛出龜  
書赤文綠字以授軒轅  
接萬神於明庭今寒門谷口

是也史記黃帝時萬諸侯而神靈之封居七千其後  
黃帝接萬靈明庭明庭者甘泉也所謂寒門者

谷也統箋按史記正義曰九變山中西謂之谷口  
即古寒門在雍州醴泉縣東北四十里孝經疏曰明

庭明堂也衡案接萬神於明庭神指諸侯言合諸  
侯於明堂也國語禹致羣神於會稽之山韋註羣神

謂主山川之君為羣神之主故謂之神也成伯璵禮  
記外傳曰明堂古者天子布政之宮黃帝享百神於

明庭是也唐虞爲五府明堂大道錄云案周禮大司樂一至以樂降神一變而致羽物及川澤之亦再變而致羸物及山林之亦三變而致鱗物及邱陵之亦四變而致毛物及墳衍之亦五變而致介物及土亦六變而致象物及天神又云樂六變則天神皆降八變則地亦皆出九變則人鬼可得而禮此皆禘禮行於明堂故云接萬靈於明庭衡案此說非是蓋誤解靈字故以天神地亦人鬼當之其實史記所云接萬靈指當時諸侯言故路史註羣神謂諸侯五等也○又案寒門他本多作塞門誤

韓詩外傳黃帝卽位施惠承天一道修德惟仁是行  
宇內和平未見鳳凰惟思其象夙寐晨興乃召天老  
而問之曰鳳象何如天老對曰夫鳳象鴻前麟後蛇  
頸而魚尾龍文而龜身燕頤而雞喙戴德負仁抱忠



挾義小音金大音鼓延頸奮翼五彩備舉鳴動八風  
氣應時雨食有質飲有儀往卽文始來卽嘉成惟鳳  
惟能通天祉應地靈律五音覽九德天下有道得鳳  
象之一則鳳過之得鳳象之二則鳳翔之得鳳象之  
三則鳳集之得鳳象之四則春秋下之得鳳象之五  
則鳳沒身居之黃帝曰於戲允哉朕何敢與焉於是  
黃帝乃服黃衣戴黃冕致齋於宮鳳乃蔽日而至黃  
帝降於東階西面再拜稽首曰皇天降祉不敢不承  
命鳳乃止帝東園集帝梧桐食帝竹實沒身不去詩

曰鳳凰于飛翩翩其羽亦集爰止

世紀黃帝齋於中宮有大鳥雞頭鸞喙龜頸龍形麟翼魚尾狀如鶴體備五色三文成字首文曰順德背文曰信義膺文曰仁知不啄生蟲不履生草或止帝之東園或巢阿閣或鳴於庭其飲食也其雄自歌其雌自舞音如簫笙

五十九年貫胸氏來賓長股氏來賓

衡案山海經海外南經貫匈國其爲人胸有竅在臍國東海外西經長股之國在維常北被髮一曰長腳

吳任臣謂卽穆天子傳留骨之邦是也尸子曰四夷之民有貫胸者有深目者有長肱者黃帝之德嘗致之淮南子三十六國有修股民修股卽長股也

七十七年昌意降居若水產帝乾荒

史記五帝紀嫫祖爲黃帝正妃生二子其後皆有天下其一曰元囂是爲青陽青陽降居江水其二曰昌意降居若水。志疑案路史言嫫祖生昌意元囂則昌意乃元囂之兄未知孰是至青陽固別一子國語謂帝妃方雷氏所生則元囂青陽實是二人史公合

而一之亦猶漢志并昌意蒼林爲一人史註皇甫謐  
認夷鼓蒼林爲一人也帝繫曰黃帝產青陽及昌意  
青陽降居泚水昌意降居若水大戴禮蓋以元囂爲  
青陽史仍其誤當衍是爲青陽青陽六字耳

水經若水注山海經曰南海之內黑水之間有木名  
若木若水出焉又云灰野之山有樹焉青葉赤華厥  
名若木生崑崙山西附西極也淮南子曰若木在建  
木西木有十華其光照下地故屈原離騷天問曰羲  
和未陽若華何光是也然若木之生非一所也黑水

之間厥木所植水出其下故水受其稱焉若水公流  
間關蜀土黃帝長子昌意德劣不足紹承大位降居  
斯水爲諸侯焉娶蜀山氏女生顓頊於若水之野有  
聖德二十登帝位承少皞金官之政以水德寶歷矣  
路史黃帝紀元妃西陵氏曰嫫祖嫫嫫雷同音羸嫫  
累嫫雷省非是集  
韻嫫祖爲  
切僞切非生昌意元囂龍苗昌意就德遜居若水有  
子三人長曰乾荒次安季悃乾荒生帝顓頊是爲高  
陽氏。國名紀若水昌意國今越雋之臺登盟會圖  
疏以爲都故世本云允姓國昌意降居爲侯非也

統箋按山海經曰黃帝嫫祖生昌意降居若水產帝乾荒乾荒卽韓流郭氏曰竹書昌意降居若水產帝乾荒乾荒卽韓流也

二百年地裂

統箋按開元占經曰尙書說曰黃帝將亡則土裂

帝陟

原註帝王之崩皆曰陟書稱新陟王謂新崩也

統箋按韓

子曰竹書紀年帝王之沒皆曰陟陟昇也謂昇天也尙書康王之誥惟新陟王蔡傳曰陟昇退也成王初崩未葬未諡故曰新陟王帝以土德王應地裂而陟葬羣臣有左

徹者感恩帝德取衣冠几杖而廟饗之

洪頤煊曰韓愈黃陵廟碑

引竹書紀年云帝王之崩曰陟太平御覽七十九引抱朴子曰汲冢中竹書言黃帝既仙去其臣有左徹者削木爲黃帝之像帥諸侯朝奉之據二條此非註文可知今本帝後總論或年下附註疑紀年原文如此後人傳寫諸侯大夫歲時朝焉統箋按史記曰黃帝置左右大

監以監萬國漢郊祀志黃帝萬諸侯神靈之封七千世紀曰黃帝時徵諸侯使力牧神皇直討蚩尤氏擒之於涿鹿之野周書黃帝時有諸侯夙沙氏管子黃帝得六相而天地治神明至蚩尤明乎天道故使爲當時太常察乎地利故使爲廩者奢龍辯乎東方故使爲工師祝融辯乎南方故使爲司徒大封辯乎西方故使爲司馬后土辯乎北方故使爲李陶潛羣輔錄黃帝七輔風后受金法天老受天籙五聖受道級知命受糾俗窺紀受變復地典受州絡力牧受準片莊子曰黃帝將見大隗於具茨之山方明爲御昌寓

參乘於襄城之野七聖皆迷傳子曰黃帝以風后配  
上台后土配中台五聖配下台故後世以三公爲三  
台世本黃帝之臣臣胥作服牛相土作駕馬雍父作  
杵臼於則作屣履世本註黃帝始立史官蒼頡沮誦  
居其職七畧孔甲黃帝之史也呂氏春秋大槁作甲  
子咸如作虜首羲和作占日常儀作占月后益作占  
歲高元作室虞姁作舟赤冀作曰乘雅作駕史皇作  
圖巫彭作醫巫咸作筮伶倫造律呂榮媛鑄十二鍾  
淮南子曰黃帝治天下而力牧泰山稽輔之劉氏歷  
正問曰黃帝爲蓋天或曰命容成爲之史記黃帝命  
風后力牧常先大鴻以治民天文志黃帝始受河圖  
鬲苞授規日月星辰之象蔡邕禮志黃帝使岐伯作  
軍樂凱歌虞喜志林黃帝命風后作指南車五帝外  
紀黃帝命大容作咸池之樂命共鼓化狐列木爲舟  
命邑夷法斗周旋作大輅命俞跗岐伯雷公察明堂  
究息脉巫彭桐君處方餌命隸首作算數命伶倫造  
律呂命甯封爲陶正赤將爲木正此  
皆黃帝時諸侯大夫所可考見者



史記五帝紀黃帝崩塋橋山。孝武紀黃帝采首山

銅鑄鼎於荆山下。鼎既成有龍垂胡髯下迎黃帝黃

帝上騎羣臣後宮從上者七千餘人

衡案風俗通水經注俱作從登

者七龍乃上去餘小臣不得上乃悉持龍髯髯拔墮

黃帝之弓百姓仰望黃帝既上天乃抱其弓與胡髯

號因名其處曰鼎湖其弓曰烏號黃帝已僊上天羣

臣塋其衣冠

衡案路史發揮引程子曰黃帝之治天下其精微之感蕩上浮而下沉故爲百

神之宗則是百神受職於庭矣帝乃采銅者鍊剛質也登彼首山者就高明也作爲鑪火者鼓陽化也神鼎者熟物之器也上水而下火二氣升降以相濟中和之實也羣龍者衆陽之器也雲龍屬也帝鄉者靈

臺之闕而心術之變也羣小臣智識之不及者攀龍  
之胡有見於下也不得上昇無見於上也有見於下  
無見於上者士也上下無見者民也弓裘衣冠帝所  
以善世制俗之具也民無見也懷其所以治我者而  
已

世紀黃帝在位百年而崩年百一十歲矣

路史黃帝紀采首山之銅鑄三鼎於荆山之陽以象

泰乙八月既望鼎成死焉

五行書帝以甲戌日崩一云戊午創經言黃帝鑄鼎

以疾崩葬橋山後五百年山崩空室無尸惟存寶劍赤舄又列仙傳云黃帝自擇亡日至七十日亡七十日還葬於橋山故莊子曰

若人者將擇日而登假

葬上郡陽周之橋山其臣

左徹感恩取衣冠几杖而廟像之率諸侯而朝焉

年而立子

晉周生招魂議云黃帝體仙登遐其臣扶微等歛其衣冠塋之扶微誤也

年百

十有七或云三百宰予以問於孔子孔子曰人賴其利百年用其教百年威其神百年曰三百年也

統箋按張華雜說曰黃帝治天下百年而死漢地理志上郡陽周橋山在南有黃帝冢武帝紀北巡朔方還祭黃帝冢橋山上曰吾聞黃帝不死今冢何也或對曰黃帝已仙上天羣臣塋其衣冠郊祀志黃帝得寶鼎冕侯問於鬼臾區對曰黃帝得寶鼎神策是歲己酉朔旦冬至得天之紀終而復始於是黃帝迎日

推策後率二十歲得朔旦冬至凡二十推三百八十年黃帝僊登於天史記封禪書公玉帶曰黃帝時雖封泰山然風后封臣岐伯令黃帝東封泰山禪凡山合符然後不死焉今竹書紀年仍書帝陟則黃帝亦何嘗不死也

鄭環曰封禪書鼎成有龍下迎此乃方士之說史公記之以見武帝之惑也紀年書曰陟則黃帝未嘗登僊可知蓋後之合符所以察吏封禪所以升中鑄鼎所以鎮神姦非求不死也

衡案世以黃帝爲不死仙去仙之者神之也而或者疑之謂夫帝之死以甲戌也明明有其日矣其葬之橋山也明明有其地矣奚其神嗚呼世蓋以不死爲神而不知帝之神非神於不死特神於制作耳吾觀土德旣興而蓋天甲子陰陽算數以及冕旒舟車貨幣諸器物靡不自帝作始非神而能若是乎作者之謂聖聖之者神之也神不必不死死不必不神況夫帝之生壽邱也神之爲感帝之戰涿鹿也神之爲助帝之迷襄城也神與之遊迨至訪廣成於空桐禮雲

臺於元圃而帝之神明不測亦將與天地比壽矣然則帝之死固猶乎人帝之死而不死豈猶乎人哉而世方以清淨寂寞與老氏並稱是亦未覩黃帝之制作而專以不死爲神者也

帝摯少昊氏

韓怡曰明張遂辰本有此文○衡案范本孫本同今從之

原註約按帝摯少昊氏

鄭環曰周書作質左傳世紀作摯亦作摯贊同年代歷作

梨

母曰女節見星如虹下流華渚

統箋按即華胥之渚在藍田縣旣

而夢接意感生少昊

春秋元命包黃帝時大星如虹下流華渚女節夢接意感生白

帝朱宣○宋均曰朱宣少昊氏○統箋按女節乃少昊母而五帝外紀曰少昊金天氏名摯已姓黃帝之

子元節也母曰嫫祖感大星如虹下流華渚之祥而生帝以姬姓爲己姓以女節爲嫫祖是皆外紀之誤

也登帝位

統箋按昭二十九年傳蔡墨曰少昊有四叔曰重曰修曰該曰熙實能金木及水世

不失職遂濟窮桑杜註窮桑少皞之號也賈逵曰處

窮桑以登爲帝蓋未爲帝居魯北旣爲帝居魯劉公

幹魯都賦曰昔大庭氏肇建厥居少昊受命亦都茲

焉前史疑問曰同一少昊元年也而世史以爲癸卯

薛史以爲丁未何也是皆

有鳳凰之瑞

統箋本無此句從舊本補

爲少昊登帝位之證也

或曰名清不居帝位

統箋按國語晉司空季子曰凡黃帝之子二十五宗其得姓者

十四人爲十二姓姬酉祁已緜蒧任荀偃姁偃依是

也惟青陽與蒼林同於黃帝故皆爲姬姓韋昭曰青

陽金天帝少昊也皇甫謐曰少昊字青陽据漢律厯

志引考德曰少昊曰清者黃帝之子青陽也是其

子孫名摯立魏曹植少昊贊曰祖自軒轅青陽之裔

則少昊乃青陽之子非青陽卽少昊也五帝本紀曰

青陽降居江水地理志曰安陽古江國括地志安陽故城在豫州新恩縣西南八十里則青陽非少昊而亦不居

**帥鳥師居西方**

統箋按遠遊章句曰西皇者少昊所居西海之濱山海經

東海之外大壑少昊之國然則少昊以金德王故曰金天氏亦曰西皇非必定居西方之謂也以鳥

**紀官**

左傳昭公十七年秋郊子來朝公與之宴昭子問焉曰少皞氏鳥名官何故也郊子曰我高祖

少皞摯之立也鳳鳥適至故紀於鳥爲鳥師而鳥名鳳鳥氏歷正也元鳥氏司分者也伯趙氏司至者也青鳥氏司啟者也丹鳥氏司閉者也祝鳩氏司徒也鵙鳩氏司馬也鳴鳩氏司空也爽鳩氏司寇也鶡鳩氏司事也五鳩鳩民者也五雉爲五工正利器用正度量夷民者也九扈爲九農正扈民無淫者也○杜註鳳鳥知天時故以名歷正之官元鳥燕也以春分來秋分去伯趙伯勞也以夏至鳴冬至止青鳥鶡鳩也以立春鳴立夏止丹鳥鶯雉也以立秋來立冬去入大水爲蜃上四鳥皆歷正之屬官祝鳩鶡鳩也鶡



鳩孝故為司徒主教民鵠鳩王鳩也驚而有別故為  
司馬主法制鵠鳩鵠鵠也鵠鳩平均故為司空平水  
土與鳩鷹也驚故為司寇主盜賊鵠鳩鵠鵠也春來  
冬去故為司事鳩聚也治民上聚故以鳩為名五雉  
雉有五種西方曰鷩雉東方曰鷩雉南方曰翟雉北  
方曰鷩雉伊洛之南曰翟雉尾有九種也春尾鷩鷩  
夏尾鷩鷩元秋尾鷩鷩藍冬尾鷩鷩黃棘尾鷩鷩丹  
行尾鷩鷩啗啗  
宵尾噴噴桑尾鷩鷩脂老尾鷩鷩以九尾為九農之號  
各隨其宜  
以教民事

世紀少昊帝名摯字青陽姬姓也即圖讖所謂白帝  
朱宣者也故稱少昊金天氏在位百年而崩

路史小昊青陽氏少昊幣文作小紀姓世紀青陽姬

窮桑氏名質是為挈其父曰清黃帝之第五子方僂  
嬴姓非

氏之生也胙土於清是爲青陽元爲紀姓配於類氏  
曰娥居河之微逆星流槎奏便娟之樂樂而忘歸震  
而生質白帝子也旣生其渚爲陵秀外龍庭月縣通  
頤襲青陽以處雲陽故謾號以青陽亦曰雲陽氏以  
金寶厯色尙白故又曰金天氏遠憲大昊而乘西行  
是稱少昊其卽位也五鳳適至而乙遺書故爲鳥紀  
鳥師而鳥名在位八十有四載落年百有一塋於雲  
陽其神降於長流之山主祀於樛是司反景故傳又  
稱西皇都於小顓以字窮桑故亦曰窮桑氏

賈逵曰  
處窮桑

以登帝天下號曰窮桑帝實積記一曰窮桑氏一曰金寶氏一曰桑邱氏是爲白帝然非河圖所謂白帝朱宣也或云曲阜鹵是以云小昊之虛

曲阜無攷世紀以爲都徐州蒙

羽之野奎婁之次晉志云少昊始自窮桑而遷都曲阜因傳與世紀也曲阜魯城中小地名也○發

揮元囂青陽少昊三人也說者以元囂爲青陽或以

青陽爲少昊或合三者以爲一劇爲淺陋按春秋緯

黃帝傳十世雖未足信然竹書紀年黃帝至禹爲世

三十世以今攷紀亦一十二世昔漢杯育治始終黃

帝而來迄元鳳之三三千六百二十九載帝世年世

正自多有內簡黃帝後有帝鴻有帝魁有青陽有金

天而後乃至高陽金天少昊俱爲青陽之子攷之書

則無疑質之世則不詭青陽元囂自二人固也

王水黃帝

經序云黃帝九子一曰帝鴻封冀二曰金天封荆三曰摯封青四曰青陽封徐五曰顓頊封豫六曰高陽封雍七曰帝嚳封梁八曰帝辛封兗九曰姬都封揚子者非謂其生也謂其世也求之世則然矣而其記則誤也二金天當是帝魁三摯當是少昊四青陽則少昊之後六高陽則顓頊之子八高辛則摯九姬都則堯也司馬公作史記不紀少昊畧不識其所出而元

囂不得居帝位夫少昊之桀度顯在人自三代以來皆所尊用祀於五帝之位正於月令之次德之在人如是之著而元囂不得居帝位則元囂非少昊明矣

史記云黃帝生元囂是爲青陽降居江水此太史公之誤也黃帝之子二十五宗賜姓十二惟紀有二餘十有三皆姬姓也青陽與夷彭同爲紀姓元囂與蒼林同爲姬姓少昊生於青陽循其紀姓帝嚳出於元囂循其姬姓世本紀姓出於少昊而帝嚳之子帝堯猶襲姬姓氏姓之來各有派別則元囂青陽又不得爲一明矣夫元囂降居江水青陽安得降居江水之事蓋太史公統記二人皆出黃帝而並列之後世因傳習而誤之其初宜曰生元囂青陽元囂降居江水

爾

釋史記本紀曰黃帝之子曰元囀是爲青陽降居  
江水不得在位是不然青陽與元囀皆黃帝之子非  
一人也青陽卽少昊氏也少昊之居西方蓋在蚩尤  
旣滅之時其登帝位也乃在黃帝升遐之後何以明  
之周書曰帝執蚩尤殺之於中冀乃命少昊清司馬  
鳥師以正五帝之官故名曰質質卽少昊之名摯是  
也摯有聖德嗣位爲帝都於曲阜非西方也明矣紀  
年曰少昊不居帝位卽鳥師居西方以鳥紀官是又

不然命官天子之事也方少昊之宅西所任者侯伯之職所司者一方之治及其立爲帝也鳳鳥適至始因之以紀官使少昊而終於西方將已亦在雲師雲名之列又何由鳩雉扈農設官備物哉周書所稱亦未可盡據矣古史考曰宗師大昊之道故曰少昊是又不然少昊其初立國之名也猶堯之爲唐舜之爲虞三代之爲夏商周皆先有其號及有天下因而不改豈其黃帝之子作述一堂乃近舍軒后之法遠修戲皇之道哉問者曰少昊之爲帝信矣然則五帝德

何以不載曰帝德因宰我之問而及之也少昊續緒承家德協黃帝是以宰我未問孔子亦不言非謂其不帝也然則繫辭何以不序曰易序伏羲氏以來制作之君少昊顓頊帝嚳皆無所制作故統言黃帝堯舜略不備舉非謂其皆不帝也史見元嚳之降處江水也則以爲青陽不帝紀年見少昊之以鳥名官也則以爲帥鳥師居西方世紀見少昊爲金行之帝也則以爲元嚳自江水登帝位是皆恍忽不得其實故備論焉



史記志疑或問先儒皆以少昊帝爲黃帝子而少昊  
卽青陽詎不然歟曰否此皇甫謐之徒妄論也而其  
誤實自潛夫論五德志來史不紀少昊固屬脫漏然  
史之失在以元囂青陽爲一人未嘗以元囂青陽爲  
少昊帝摯也考逸周書嘗麥解云赤帝命蚩尤字少  
昊以臨四方又云黃帝執蚩尤殺之於中冀命少昊  
清司馬鳥師以正五帝之官漢志引考德云少昊曰  
清黃帝之子清陽其子孫名摯立爲金德天下號金  
天氏國語云少昊氏之衰九黎亂德顓頊受之魏曹

植陳思王集少昊贊云祖自軒轅青陽之裔則少昊  
摯乃青陽之胄而少昊疑是當時顯職青陽繼蚩尤  
居之故與司馬對稱至摯有天下仍其舊號奈何以  
帝少昊爲黃帝之親子哉路史以青陽爲少昊之父

亦非

晉郭璞山海經海內經註引世  
本云桑祖產青陽與帝繫同誤

鄭環曰周書嘗麥解命蚩尤字於少昊以臨西方則  
少昊本西方地名晉志少昊始自窮桑而遷都曲阜  
拾遺記窮桑者西海之濱蓋少昊乃西方之總名窮  
桑乃少昊之專名黃帝滅蚩尤清時爲司馬使之帥

其屬居其地以正五行之官也少昊司馬本其初而言鳥師要其後而言正五行之官舉其職而言清後卽帝位都曲阜爲鳥師而鳥名因以窮桑之名被於曲阜而少昊之號亦不易以志不忘所自始故天下謂之少昊金天氏而非終於居西方也

衡案春秋命厯序云黃帝傳十世易稽覽圖云黃帝一千二百五十年此語雖不足盡憑然路史載有帝鴻帝魁而後至少昊則少昊之上固有史書所不能盡載者矣世以少昊爲黃帝之後衆口同稱悉無異

議吾於此竊有疑焉夫宓犧之與黃帝其聖一也何有熊之後祖孫父子綿綿延延續登大寶而風姓之裔竟寥寥無一爲帝者乎其疑一也且少昊旣爲黃帝之後矣則當近守軒帝之法庶纘承不愧爲令辟胡乃宗師太昊之道而曰少昊直若嗣世者然其疑二也况少昊之號並非稱於登帝位之後案逸周書嘗麥解云乃命少昊清司馬鳥師以正五帝之官則是當黃帝執蚩尤之時已自稱少昊且不雲師而鳥師云云矣其疑三也夫帝子必德劣然後降居若昌

意之降於若水子朱之放於丹水其例也青陽未聞就德何乃遠處窮桑其疑四也抑世之以少昊爲軒轅後者將以其立爲世及乎則黃帝傳位帝鴻帝魁而後未聞內禪是帝魁不得爲少昊父少昊不得爲帝魁子也若云直繼軒黃其又何以置鴻魁二世耶其疑五也竊嘗論之當黃帝時所謂少昊清司馬鳥師者乃庖犧風姓之世胄而少昊帝摯之遠祖也案三墳云伏犧易九頭爲九牧因居方而置城郭安知不分封其子以宇於西耶以故得邑於窮桑而襲太

皞之號爲少皞氏再傳爲黃帝司馬之官用本國之  
兵扼其西路以掃蚩尤之餘孽又數傳至帝摯以聖  
德崛起西陲適當黃帝氏衰遂進陟帝位不得謂黃  
帝時爲司馬之少昊卽後世有天下之少昊也揆之  
情事當是如此然惜無引據未敢遽以臆斷也丹壺  
磨滅吾安得起皇古而問之又案羅氏發揮引紀年  
云黃帝至禹爲世三十世則少昊非卽繼黃帝而立  
可知矣而世並抹去少昊一代何耶

竹書紀年集證卷一終

竹書紀年集證卷二

江都陳逢衡學

帝顓頊 帝嚳

帝顓頊高陽氏

原註母曰女樞

統箋按蜀國春秋曰乾荒娶蜀山女曰樞是為阿女所謂淳子也生顓頊

見瑤光之星

星傳北斗第七星曰瑤光

貫月如虹感已於幽房之

宮生顓頊於若水

河圖握矩瑤光之星如虹貫月正白感女樞於幽房之宮生黑帝顓

頊首戴干

首戴干戈

春秋元命包顓頊戴干是謂清明發節移度蓋象招搖○春秋

演孔圖顓帝戴

有聖德生十年而佐少昊氏二十而

干是謂崇仁



登帝位

史記五帝紀昌意娶蜀山氏女曰昌僕生高陽高陽有聖德焉帝顓頊高陽者黃帝之孫而昌意之子也○志疑案史之難信未有如帝王統系者也其所作五帝夏殷周等紀及世表楚世家多取大戴禮世本諸書然大戴禮漢儒采錄不皆可据世本出於周末復經秦殘滅之餘烏足盡憑夫馬班以漢人作漢史尚不識高帝先代但記其爲豐公太公而已矧欲明二千年以前之譜牒耶乃襲訛仍舛謂顓頊爲黃帝

之孫譽爲黃帝之曾孫舜爲黃帝九世孫堯禹契稷  
並爲黃帝元孫是黃帝者五帝三王之大祖也此與  
兵法神仙醫術家託附軒轅何異今依其說稽之黃  
帝之崩傳次子昌意之子顓頊顓頊之崩傳伯父元  
囂之孫譽譽崩傳第四妃之子摯及第三妃之子堯  
堯崩下傳族元孫舜舜崩上傳四世祖禹未免紛乖  
試思黃帝何以不傳儲嫡元囂顓頊何不以傳冢嗣  
窮蟬譽稱聖帝稷契堯又四子中之長且聖者明聰  
如譽寧有不傳元妃所生之稷反越班而立下妃所

生不善之摯摯死而以次當立者莫如稷乃稷不得立并次妃所生之契亦不得立而堯爲天子何哉然猶可諉曰唐侯德盛也稷契爲堯兄則知稷契者宜莫如堯吾以爲不待疇咨而早登庸矣乃以欽明文思之聖弟在位七十載久不能用必俟舜始舉之有是理乎堯旣倦勤則陟位之命固宜非稷卽契胡當日巽四岳禪重華而兩聖兄獨弗之及得母親疎倒置耶且元囂昌意黃帝之二子元囂三傳生堯昌意七傳生舜豈元囂之後俱長年而昌意之後多不永

堯與禹爲同高祖兄弟堯旣近舍稷契則應禪於禹  
無假乎詢訪決者而反遙授不相屬之舜已有可議  
况舜爲堯族元孫安得當身接禪卽云相及自其一  
家安得謂其以天下予人大聖如舜又在戚屬堯寧  
不聞而必由岳牧咸薦厯試乃用其初爲父母所惡  
屢瀕於死則堯安得稱欽明文思九族旣睦二女釐  
降是以族曾孫娶曾祖姑不更瀆倫亂序乎顓頊至  
舜厯年甚久而鯀禹遂仕盡四朝何如此其壽堯舜  
在位幾百五十年然後傳禹何禹之生又如此其晚

舜傳位於四世祖亦一家人何乃與堯之傳舜並號  
子賢契十三傳爲湯稷十三傳爲王季則湯與王季  
爲兄弟矣而禹契稷三聖共事堯舜禹十七傳至桀  
湯三十傳至紂二代凡千餘年而稷至武王纔十六  
傳厯盡夏商之世武王竟以十四世祖伐十四世孫  
其誰信之簡狄爲帝妃豈有帝妃而浴於川者稷爲  
嚳元子豈有帝子而見弃者凡此皆不足依據余旁  
搜典籍廣覽先儒之論然後知五帝三王之世次多  
有遺錯而顓頊舜禹均不祖黃帝曷以斷之古者一

代之興必建立氏號其後嗣卽因而不改禮祭法疏  
引春秋命厯序云黃帝傳十世少昊傳八世顓頊傳  
二十世帝嚳傳十世并紀其年宋劉恕通鑑外紀据  
之雖緯書未盡可憑而此條足補史缺以濟諸說之  
窮然則黃帝有天下閱三千餘年而後顓頊興是顓  
頊之上世莫考史有疎脫矣顓頊有天下閱三百餘  
年而後嚳興是嚳之上世莫考史有疎脫矣嚳有天  
下閱四百年及摯而衰堯始興是堯之上世莫考矣  
路史餘論載呂梁碑云舜祖幕幕生窮蟬窮蟬生敬

康敬康生喬牛喬牛生瞽瞍瞽瞍生舜其序世次無  
句望一代而窮蟬實非顓頊子是史於舜之上世有  
差繆矣漢志引帝系云顓頊五世而生鯀則鯀亦非  
顓頊子是史於禹之上世有紕漏矣索隱引譙周古  
史考云契必非嚳子其父微不著名棄帝嚳之胄其  
父亦不著鄭康成箋生民詩云姜嫄當堯之時爲高  
辛氏世妃注周禮大司樂云姜嫄無所妃是以特立  
廟祭之賈孔謂嚳後世子孫之妃又引曹魏時博士  
張融曰稷契年稚於堯堯不與嚳並處帝位則稷契

焉得爲嚳子若使嚳爲稷契父帝嚳聖夫姜嫄正妃  
詩何故但歎其母不美其父則知堯與稷契非兄弟  
嚳非堯稷契之父摯母姬訾堯母陳豐契母簡狄稷  
母姜嫄皆非嚳妃而史於契稷之上世有誣戾矣至  
吾謂顓頊舜禹不祖黃帝者路史後紀據國語呂梁  
碑以爲舜之系出虞幕非出黃帝夫國語史伯舉四  
代之祖稱虞幕與禹契棄並列居先更徵左傳昭八  
年史趙曰自幕至瞽瞍無違命舜之祖幕決無可疑  
而左傳又云陳顓頊之族國語又云幕能帥顓頊者



則幕之祖顓頊尤審是不止舜不祖黃帝并顓頊亦不祖黃帝既顓頊不祖黃帝而鯀爲顓頊五世孫禹亦不當祖黃帝蓋幕國於虞故爲虞氏特幕之上世畧而莫考未知幕爲顓頊之子歟抑非顓頊之子歟窮蟬旣爲幕子未知窮蟬之去顓頊中隔幾世而顓頊之祖父與顓頊之子孫俱未知誰何往牒敗亡莫從勘檢已由此觀之堯契稷出帝嚳同祖黃帝爲一族舜禹出顓頊爲一族此二族者輩行之尊卑莫問年歲之遠近無稽祇認爲遙遙華胄焉爾若依史謂

皆出黃帝將何異王莽之以舜出於嚳堯出於顓頊  
乎卽或謂黃帝顓頊亦一族固已異姓別宗懸曠疎  
絕譬若魯之與宋秦之與趙也魯未嘗不娶宋子趙  
未嘗不娶秦嬴而尚奚疑於嬪虞之二女哉蜀秦宓  
辨五帝非一族譙周嘗從諮訪見三國志則古史考  
本於宓說而濟南馬氏驥作繹史更暢厥旨余頗宗  
其說故綜其梗槩而著之於此

潛夫論五德志謂嚳  
爲伏羲後堯爲神農

後舜爲黃帝後禹爲少昊後湯爲顓  
頊後皆不同祖其說又別未知所本

路史高陽紀帝顓頊高陽氏姬姓

古史攷以爲姁姓  
纂則謂顓帝風姓

名曰顓頊

顓頊厚養也

黃帝氏之曾孫祖曰昌意黃帝之

震適也行劣不似遜於若水取蜀山氏曰景嫫

一作景嫫

搜神記世紀作景僕

生帝乾荒是襲若水

世紀作弱水非

取蜀山氏曰

樞是為河女所謂淖子也淖子感瑤光於幽防而生

顓頊渠頭併幹通眉帶午年十五而佐小昊封於高

陽

統箋按宋衷曰顓頊名高陽有天下之號也郡縣志

曰高陽故城在汴州雍邱縣西南二十九里高陽佐

少昊有功受封此邑一統志高陽城在開封府杞縣

西二十九里是也外紀曰顓頊自窮桑徙帝邱於周  
爲衛春秋傳曰衛顓頊之虛也謂之帝邱今東郡濮  
陽是也地理通釋曰顓頊都衛爲帝邱後徙高陽稱  
高陽氏一統志高陽城在保定府城東南七十里城  
周迴九里相傳顓頊所築又有顓頊城在河間府任  
邱縣廢鄭州東北三郡記云顓頊所造是始封時高  
陽在杞縣既有天下亦有高陽在保定及任邱凡三  
也

衡案大戴記黃帝產昌意昌意產高陽是爲帝顓頊

又云昌意娶於蜀山氏謂之昌濮氏產顓頊此說貽  
誤不淺故史記曰黃帝之孫昌意之子世紀亦曰母  
曰景僕蜀山女爲昌意正妃謂之女樞金天氏之末  
女樞生顓頊於若水至王子年拾遺記遂撰出昌意  
出河濱遇黑龍負圖云生子必叶水德而王至十年  
顓頊生手有文如龍斯愈誕而愈支矣是皆以黃帝  
二世生顓頊而不知顓頊之去黃帝相隔十餘世卽  
依山海經多韓流一代羅氏路史因謂爲黃帝氏之  
曾孫亦非案韓流卽紀年之乾荒夫乾荒之生當黃

帝卽位之七十七年閔十世而少昊立又閔八世而顓頊立顓頊不得親見黃帝黃帝不得傳位顓頊也而鬻子乃云顓頊十五而佐黃帝呂氏春秋乃云嘗得學黃帝之所以誨顓頊豈不戾耶至若佐少昊之說則有辭矣莊子疏十五佐少昊二十登帝位世紀顓頊生十年而佐少昊蓋指少昊金天第八世而言非謂少昊帝摯也其時九黎亂德民神雜揉顓頊於是起而平之命南正司天北正司地故白虎通云謂之顓頊何顓者專也能專正天人之道故謂之顓頊

也顓頊有天下號曰高陽高陽者陽猶明也道德高明也亦謂其時泯棼眩惑宵如長夜顓帝以其高明之德旁燭無疆依鬼神而制義治氣性以立教如日在天萬物作覩故得以乾剛居九五之尊而天下又一治也如謂當少昊帝摯之時焉得民惑神怪天地晦冥如此乎

元年帝卽位居濮

路史高陽紀始都孤棘二十爰立乃徙商邱以故柳城衛濮俱爲顓頊之墟兆迹高陽故遂以高陽氏○

國名紀濮陽帝後所都今澶之屬縣所謂帝邱有顓  
帝城城內帝冢亦號顓頊之虛

統箋按前史疑問曰同一顓頊元年也而世史以爲  
丁未薛史以爲辛未何也今竹書不言無從考也漢  
志東郡濮陽故帝邱許敬宗曰以顓頊所居故謂之  
帝邱

十三年初作歷象

韓本作  
十二年

古史考顓帝以孟春正月爲元其時正朔立春五星  
會於天歷營室天曰作時地曰作昌人曰作樂鳥獸



萬物莫不應和故顓帝聖人爲厯宗也

路史高陽紀乃注新厯十三月以爲元歲紀甲寅上日乙巳日月直艮維之初而五星會於天厯

統箋按洪範傳曰厯始于顓頊上元太始闕蒙攝提格之歲畢陬之月朔日己巳立春日月俱在營室五度是也秦顓頊厯元起乙卯漢太初厯元起丁丑推而上之皆不值甲寅猶以日月五緯復得上元本星度故命曰闕逢攝提格之歲而實非甲寅

衡案漢藝文志顓頊厯二十一卷律厯志黃帝造厯

元起辛卯而顓頊用乙卯晉書律厯志少昊則鳳鳥  
司厯顓頊則南正司天今據紀年云初作厯象則劉  
氏正厯問所謂顓頊造渾天儀是也

二十一年作承雲之樂

呂氏春秋古樂篇帝顓頊生自若水實處空桑乃登  
爲帝惟天之合正風乃行其音若熙熙淒淒鏘鏘帝  
顓頊好其音乃令飛龍作效八風之音命之曰承雲  
以祭上帝乃令鰥先爲樂倡鰥乃偃寢以其尾鼓其  
腹其音英英

路史高陽紀爰命鱣先爲倡洎蜚龍稱八音會八風之音以爲圭水之曲以召氣而生物浮金効珍於是鑄爲之鍾作五英六經之樂以調陰陽享上帝命曰承雲

統箋按楚辭遠遊曰張咸池奏承雲兮王逸注曰承雲卽雲門黃帝樂也又張湛注列子承雲黃帝樂淮南子有虞氏其樂咸池承雲九招時竹書未出皆未知承雲顓頊樂也

衡案承雲之樂實創始于黃帝以有景雲之瑞故也

路史命大容作承雲之樂可据疑此條當在黃帝二十年景雲見以雲紀官之後錯簡在此至顓頊所作之樂本名六莖言和律厯以調陰陽也詳見白虎通又案拾遺記顓頊居位有浮金之鍾沈明之磬以羽毛拂之則聲振百里及朝萬國之時乃奏含音之樂其音清密落雲間之羽是顓頊之樂又名含音也呂氏古樂篇鯀先以尾鼓腹之說不足深信至羅氏卽以五英六醴當承雲之樂似亦未的

三十年帝產伯鯀居天穆之陽

統箋按世本黃帝生昌意昌意生顓頊顓頊生伯鯀  
李石續博物志曰黃帝產昌意歷顓帝窮蟬敬康句  
芒矯牛瞽睽而後及舜則顓帝後凡六世其云顓帝  
產鯀鯀產文命是爲禹則顓頊只二世恐無是理大  
抵古人本其所自出皆謂之產如高陽氏有才子八  
人蒼舒齔斟禱鯀大臨龐降庭堅仲容叔達皆以爲  
顓頊產也乃顓頊在位七十八年此八人者已數十  
歲矣後高辛在位六十三年摯在位九年堯在位七  
十三年舜始受終于文祖舉而用之謂之八凱則以

數十歲之人用之於一百四十五年之後以爲皆顓  
頊所產之子有是理乎惟漢律厯志引帝繫曰顓頊  
五代而生鯀鯀生禹庶幾爲得其實山海經東海之  
外大壑少昊孺帝顓頊于此棄其琴瑟羅泌路史曰  
顓頊取鄒屠氏生八子一曰蒼舒卽孺帝陳一中冠  
編曰孺帝高陽氏元子駱明顓頊三十載帝元子孺  
帝產駱明居天穆之陽皆以山海經有黃帝生駱明  
駱明生白馬白馬是爲鯀以爲孺帝卽駱明又疑爲  
蒼舒皆謬說也以愚論之經所謂孺帝卽顓頊也蓋

顓頊生有聖德十年而佐少昊故有孺子之稱又十年而登帝位謂之孺帝猶後世之稱孺子王也經以其嗣少昊登帝位以臣代君故以少昊孺帝顓頊連言之若以孺帝爲顓頊元子經何以不曰顓頊孺帝而曰孺帝顓頊乎經稱駘明生白馬白馬之後爲鯀與帝繫顓頊五代生鯀之說約畧相似爲可据也  
衡案山海經云此天穆之野高二千仞郭註引竹書曰顓頊產伯鯀是維若陽居天穆之陽與今本異氏族源流云顓頊妃鄒屠氏生駘明駘明生伯鯀路史

云鄒屠氏有女履龜不踐帝內之是生禹祖及夢八  
人注謂夢日則生子八夢日而生八子故曰夢也然  
以其年攷之無論顓頊至帝嚳世代懸隔卽以今本  
紀年記之鯀生於顓頊三十年又四十八年而帝陟  
又歷高辛六十三年摯九年至堯六十一年始命崇  
伯鯀治河又九年而黜鯀年不將二百乎余疑伯鯀  
與崇伯鯀是兩人此伯鯀爲顓頊之子而崇伯鯀乃  
大禹之父也据蛙螢子共工祝融上世俱有七人而  
重黎羲和亦復世襲其號焉知伯鯀之後不又有襲



其祖之號者乎又案路史引紀年云黃帝至禹三十  
世今簡策脫落無復稽考然卽以此一語校之則由  
顓頊至禹其必十餘世可知安得謂顓帝所生之鯀  
卽禹父乎吾故曰前後有兩伯鯀也天穆山名山南  
爲陽蓋帝封鯀于天穆山之南而命之爲伯故曰居  
天穆之陽後帝啟十年舞九韶于天穆之野卽此所  
以大報本而反始也其卽禘祭始祖之義乎

七十八年帝陟

路史高陽紀在位七十有六崩

韓愈云年七十九世  
紀云九十八二十一

而立或云三  
十六立皆非  
葬東郡頓邱廣陽里鰾鰾之陽其立也  
歲居豕韋其崩也歲在駮火帝崩而元子立襲高陽  
氏是爲孺帝尋崩而帝嚳立

繹史顓頊黃帝之孫而少昊氏兄弟之子也據史則  
嗣黃帝而立據世紀則繼少昊而立少昊一代既不  
可泯則世紀爲可信乎然史之失在於輕信而多疎  
世紀之失在於牽合而附會顓頊之佐黃帝與黃帝  
之誨顓頊見於鬻子呂覽皆近古之書也世紀牽於  
二十登位之說則謂其生於金天末年十年而佐少

吳如以鬻子未可信將二十治天下之言亦並可廢  
胡爲兩歧其說吾不能爲之解也最難知者帝王之  
譜系最無徵者上世之年紀史敘昌意於元囂之下  
何由知其爲黃帝之嫡昌意降處若水亦由帝摯嗣  
位堯受唐封封建之來久矣何由知其德之劣史自  
三代以上止表其世共和以下始紀其年年固有不  
可強知也必以顓頊爲在位七十八年九十八歲則  
不得不就二十而曲爲之說此皇甫氏之蔽也  
衡案馬氏以鬻子呂覽之說爲据亦未允當

術器作亂辛侯滅之

此條徐本低一字作注非是

衡案辛侯舊以爲卽帝譽術器一名術器以襲其父  
共工之號又名共工故徐陵曰顓頊爲君阻共工之  
亂是也山海經炎帝之妻赤水之子聽訖生炎居炎  
居生節並節並生戲器戲器生祝融祝融降處江水  
生共工共工生術器術器首方顛是復土壤以處江  
水吳任臣曰案蛙螢子祝融共工上世俱有七人此  
祝融爲炎帝裔黃帝之司徒也居江水生共工共工  
生術器及句龍術器襲共工號在顓頊時作亂帝命

辛侯誅之以其弟勾龍爲后土汲冢瑣語云昔共工之卿曰浮遊旣敗于顓頊自沒深淮之淵卽術囂之臣也衡案吳註甚覈然以祝融爲黃帝司徒亦誤當在顓頊時觀紀年於術器之滅不書於七十八年之前而書於帝陟之後此中顯有脫文則所謂帝命辛侯誅之者蓋不知高陽氏之第幾世矣

帝嚳高辛氏

原註生而駢齒

春秋元命包帝嚳駢齒上法月參康度成紀配理陰陽○河圖握矩帝嚳

駢齒方頤龐顓

有聖德初封辛侯

統箋案一統志高辛里在歸德府城

珠庭化齒戴干

東門內○孫之驛曰十  
道志襄邑有高辛城代高陽氏王天下使瞽人拊

鞀鼓擊鍾磬鳳凰鼓翼而舞

統箋案通歷曰帝嚳平共工之亂作鞀鼓控楊

墳篪呂氏春秋曰帝嚳命咸黑作爲聲歌九招六列六英有篪作爲鞀鼓擊鍾磬吹苓管塤篪韜椎鍾帝嚳乃令人拊或鼓擊擊鍾磬吹苓展管篪因令鳳鳥天翟舞之帝嚳大喜乃以康帝德據此則高辛爲辛侯時平共工之亂乃作墳篪世本辛公作墳謂此也俗誤以爲平王時諸侯暴辛公始作墳豈墳篪至東周始有乎樂記曰聖人作爲鞀鼓控楊墳篪其非平王時諸侯明矣○衡案箋引呂氏春秋椎鍾下無帝嚳乃令人拊至以康帝德三十四字今特補入見古樂篇

白虎通號篇謂之帝嚳者何也嚳者極也言其能施行窮極道德也帝嚳有天下號曰高辛高辛者道德

大信也

風俗通五帝篇譽者考也成也言其考明法度醇美  
譽然若酒之芬香也

衡案大戴禮黃帝產元囂元囂產嶠極嶠極產高辛  
是爲帝譽史記五帝紀帝譽高辛者黃帝之曾孫也

高辛父曰嶠極嶠極父曰元囂元囂父曰黃帝自元  
囂與嶠極皆不得在位至高辛卽帝位高辛與顓頊爲

族子高辛生而神靈自言其名世紀帝譽高辛氏姬  
姓也其母不覺生而神異自言其名曰爰鄩甗有聖

德年十五而佐帝顓頊金樓子帝嚳高辛氏少昊之  
孫蟠極之子外紀年十五佐顓帝受封于辛年三十  
以木德代高陽氏爲天子以其肇基於辛故號高辛  
氏路史高辛紀帝嚳高辛氏姬姓曰嚳一曰逡嚳之  
字曰亡斤黃帝氏之子曰元枵之後也父蟠極取陣  
豐氏曰哀履大跡而偁生嚳方嚳之生握哀莫覺生  
而神異自言其名遂以名年十有五而佐高陽氏受  
封于辛爲侯國高陽崩而嚳是立以木紀德以上諸  
說俱以帝嚳爲顓頊族子出黃帝後如合一轍矣余



獨以爲不然梁氏曜北謂顓頊不祖黃帝然未有引  
据余攷姓纂謂顓頊風姓唐表韋氏彭氏皆云出風  
姓顓頊之後則黃帝姬姓顓頊風姓判然各別是顓  
帝亦包犧之後也顧古姓流傳真僞莫辨黃帝之與  
顓頊其同姓與否姑勿深論第謂帝嚳直嗣顓頊卽  
位則有斷乎其不然者据命厯序稽覽圖則顓頊傳  
三百五十載据路史引紀年則黃帝至禹爲世三十  
世以今紀年考之黃帝氏陟厯少昊顓頊帝嚳帝堯  
帝舜卽至帝禹止六世耳豈其然哉吾故深惜簡策

之剝落不傳也抑嘗論之本之實者其枝茂源之遠者其流長厯考諸史自漢以下其得天下以道者子孫繼立俱十餘世惟前後五代年數短促數十年易一姓餘俱相沿至數百載豈以聖德如黃帝少昊顓頊止及身而帝也乎

元年帝卽位居亳

統箋按前史疑問曰同一帝嚳元年而世史以爲乙酉薛史以爲己丑何也今竹書不言無從考也闕駟曰亳本帝嚳之虛在禹貢豫州河洛之間括地志亳

邑故城在洛州西十四里本帝營之虛商湯之都也

十六年帝使重帥師滅有鄆

吳本范本  
鄆作劓

何楷曰王符潛夫論云會在河雒之間其君驕貪嗇  
儉滅爵損祿君臣卑讓上下不臨詩人憂之故作羔  
裘閔其痛悼也會仲不悟重氏伐之上下不能相使  
遂以亡愚按逸周書史記解亦云昔有鄆君嗇儉滅  
爵損祿羣臣卑讓上下不臨禁罰不行重氏伐之鄆  
君以亡與潛夫之語相合然史記解乃周穆王所作  
以命左史戎夫者其非詩之鄆國明甚及考竹書載

帝嘗十六年使重帥師滅有鄒則史記所述鄒亡政  
帝嘗時事而王符乃取以解此詩何也

鄭環曰按書乃命重黎帝堯時事重果爲顓頊之孫  
不得于顓頊嗣少昊之初卽爲南正况得爲少昊勾  
芒乎伐有鄒之重周書謂之重氏疑重黎本少昊時  
人而顓頊復用之堯時羲和乃重黎之後而滅有鄒  
之重乃重之裔而羲之先也

衡案大戴禮顓頊產老童老童產重黎及吳回吳回  
氏產陸終陸終氏取於鬼方氏產六子其四曰萊言

是爲云鄒史記高陽生稱稱生卷章卷章生重黎吳  
回吳回生陸終陸終生子六人其四曰會人是重與  
有鄒皆顓頊裔也然高陽至會人已五代至重僅二  
代疑伐有鄒之重非與黎及吳回並世而生者也予  
因攷之昭二十九年左傳蔡墨曰少昊氏使重爲勾  
芒世不失職此少昊時之重也楚語觀射父曰顓頊  
命南正重以司天此顓頊時之重也此外另有顓帝  
後之重山海經顓頊生老童世本老童娶于根水氏  
謂之驕福產重及黎是也及此伐有鄒之重則又其

後裔也年代遠隔不得以一人當之

四十五年帝錫唐侯命

孫之騷曰堯年十三佐摯爲高辛封殖初居陶後改

國於唐爲唐侯

衡案說本路史

今定州唐昌縣

統箋按孔安國傳曰堯年十六以唐侯升爲天子皇

甫謚曰堯十五而佐帝摯受封于唐爲諸侯据竹書

堯封唐在高辛之四十五年又十八年而高辛始崩

又摯立九年而廢堯始以唐侯升爲天子加以受封

時約十餘歲堯年近四十矣傳以爲十六升爲天子

亦未然也

六十三年帝陟

原註帝子摯

衡案路史高辛崩而帝廋立襲高辛氏帝廋之立不善九載以其仲立是爲堯

羅準注云廋見年代歷史傳皆作摯故高誘陳伯宜以帝摯爲少昊而以少昊爲倍之子尹氏遂有少昊逐帝之說妄也按少昊在位八十四年摯在位九年摯立不善而少昊之德在人如此夫何疑哉立

九年而廢

外紀帝摯在位七十年崩子摯卽天子位九年而廢○史記志疑案少昊帝名摯此

摯之胄亦名摯

蓋族遠不嫌同名也路史後紀卷十

注謂世紀本衛宏云唐侯德盛摯微弱而致禪焉皇

王大紀謂襲位未久而阻通鑑外紀謂荒淫無度而廢之諸說各異疑莫能明據人表在上中則不得如後世

所言

路史高辛紀帝生三十而御天六十有三載崩塋顓

邱臺城陰野之秋山

山經九域志  
皆作狄山

繹史帝嚳高辛氏黃帝之曾孫顓頊之族子也生而  
神靈嗣高陽氏爲天子其嗣天子者以賢立也五帝  
之世以公天下爲心非至德不足以治天下非得至  
德之人不敢授以天下是以高辛高陽咸起支封又  
必試以官職故高陽十五而佐黃帝高辛亦十五而  
佐高陽詢事考言乃登大位故曰五帝官天下官天  
下者以天下爲公器惟賢是擇近不嫌於傳子黃帝



少昊是已外不妨於異姓堯舜是已少昊之後無足  
嗣帝位者而顓頊有至德顓頊之後無足嗣帝位者  
而嚳有至德有至德者登大位皆以其賢也非以其  
親也顓頊之所建帝嚳受之聰明祇肅普施利物順  
天取地節用愛民德化四訖享國七十年帝摯嗣立  
未久而崩而陶唐氏作矣然竊有疑焉記稱帝嚳四  
妃之子以嫡也則莫如立后稷以賢則堯稷契皆其  
人也不立嫡與賢而立摯豈嚳無知子之明有愛憎  
之私乎非所以論嚳也或稱摯荒淫諸侯廢之或稱

唐侯威德摯微弱而禪焉若是則堯有利天下之心  
諸侯有擅廢立之權尤非所以論堯也史記本紀但  
曰摯立不善崩而已所謂不善者德不類邪政不理  
邪民不從邪抑如書所謂有疾弗豫傳所謂弱足不  
良者邪荒淫微弱皆後世揣摩之言摯之賢不肖未  
可以臆度也意者帝摯之子摯最居長當如世紀所  
說旣而享年不永兄終弟及外紀曰帝堯年十六卽  
天子位然則帝摯之崩堯方七歲故不立堯而立摯  
殆以此與

統箋按世紀曰高辛氏以人事紀官在位七十年年  
百五歲而崩据竹書則在位止六十三年少七年一  
統志帝嚳陵在歸德府城東南四十五里

衡案帝子摯立九年而廢當是帝錫唐侯命下之注  
不當在帝陟後蓋皇古之時不拘於立嫡帝以摯年  
長是以首被錫命爲帝子如後世太子世子之類則  
所爲立九年者當在此蓋立爲儲君非於帝陟後立  
爲天子也繼以九年之內未見克肖而帝嚳廢之故  
錫命堯此時堯已分封於唐爲侯故紀年不曰錫帝

子堯命而曰錫唐侯命者明乎堯以唐侯受命代摯  
立爲帝子也不曰帝摯立九年而曰帝子摯立九年  
者明乎摯未成其爲帝而僅爲帝子也不然則所謂  
廢者將謂堯廢摯耶詎有盛德之堯而行此者若云  
羣臣廢摯共相推戴帝堯豈後世霍光廢昌邑王故  
事已先見於高辛之末耶吾故以爲九年之立不當  
在帝陟後也否則馬氏兄終弟及之說最爲允當然  
云帝嚳之崩堯方七歲亦非蓋泥於孔傳唐侯十六  
升爲天子之說也十六升爲天子當是十六升爲帝

子之沿誤耳

竹書紀年集證卷二終